

MUSLIMATI

RAMADAN 1433

BROJ 8

IZDVAJAMO

KORISTI MJESECA RAMAZANA

ramazan je mjesec MILOSTI & OPROSTA

U KOJOJ NOĆI JE LEJLETU-L-QADR

SVIJETLI PRIMJERI UČENJA KUR'ANA

KOLIKO JE SELEF UČIO KURAN U RAMAZANU



Sadržaj

Tražimo halala; pripremimo se za ramazan	3
Mjesec ramazan kroz razne aspekte	5
Hadisi	7
Koristi mjeseca ramazana	8
Nekoliko svijetlih primjera učenja Kur'ana	11
Onaj ko nahrani gladnoga	12
Ruknovi posta	13
Za Razmišljanje	14
Ona koja je najpruženije ruke	15
Potvora i skrnavljenje časti muslimana, II dio	16
Stihovi	18
U kojoj noći je Lejletu-l-Qadr?	19
Da li Ga zaista voliš II dio?	21
Ženino prisustvovanje bajram-namazima	22
Osobine Mjesta Skupljanja	24
Recepti	25
Reklame	28

TRAŽIMO HALALA

pripremimo se za ramazan

Ne postoji osoba koja se nikada nije sukobila sa nekim i došla u situaciju da se treba izviniti ili joj se treba izviniti, to jeste zatražiti halala. Nerijetko nam baš to teško pada... Ali blagodati koje ove, naizgled male riječi, nose su ogromne!

Izvinjenje nas oslobađa ljutnje i bijesa za kratko vrijeme. Zanimljivo, ali djeluje na ljutnju



kao voda na vatru. Traženje halala je ključ oprosta osobe od koje tražimo halala. Izgovaranjem ovih riječi nestaje arogancija i grižnja savjest, one djeluju oslobađajuće.

A izbjegavanjem razgovora i pravljenjem da se ništa nije desilo, dodatno uznemirava osobu koju smo povrijedile. Ona se osjeća zanemarenom, nebitnom i nedostojnom našeg izvinjenja. Umanjivanje problema na ovaj način samo više komplikuje već zategnutu situaciju. Dakle, otvorenost na prvom mjestu.

Mnogim insanima je teško da izgovore ove riječi, neki ih smatraju nepotrebnim, ne mogu da pogaze svoj ponos, a ne znaju da je pravi ponos i mudrost uviđanje i ispravljanje svojih grešaka. Zašto ti je tako teško da zatražiš halala, da priznaš da si pogriješila, da pokažeš saosjećanje za drugoga? Da li je upitanju džehl, oholost - možda misliš da ti ne možeš napraviti grešku, da sve radiš kako treba ili da ne postoji neko ko je dostojan tvoga izvinjenja? Ili želiš račune sviđati na Sudnjem danu, a kako možeš biti sigurna da baš nigdje nisi pogriješila?!

Zar da se raspravljamo pred Gospodarom svih svjetova, jer nismo željele da izgladimo odnose na dunjaluku?

Ne zaboravimo da je dunjaluk proklet i sve sto je na njemu, osim spominjanja Allaha, pa zašto da se opterećujemo sa prolaznim i nebitnim stvarima?

Mjesto traženja halala u životu muslimana je veoma značajno zato jer se ono povezuje sa traženjem oprosta od Allaha.

Allah, subhanehu ve te'ala, kaže: "I nastojte da zaslužite oprost Gospodara svoga i Džennet prostran kao nebesa i Zemlja, pripremljen za one koji se Allaha boje, za one koji i kad su u obilju i kad su u oskudici, udjeljuju, koji srdžbu savlađuju i ljudima praštaju - a Allah voli one koji dobra djela čine." (Ali Imran, 133-134)

Kaže Poslanik, salallahu alejhi ve sellem: *"Ko učini nekome nasilje, nepravdu po pitanju njegove časti ili nečega drugog, neka još danas traži halala, prije nego li dođe vrijeme kada neće vrijetiti ni dinari ni dirhemi. Tada će se, ako bude imao dobrih djela, od njegovih djela uzeti shodno nepravdi koju je učinio, a ako ne bude imao dobrih djela, tada će se od onoga kome je činio nepravdu uzeti loša djela i dati njemu."* (Buharija, br. 2449)

Traženje halala i poniznost prema sestri, bratu uzdiže insana na visoke stepene kod Allaha a i kod ljudi, dok nasuprot oholjenje nad sestrom, bratom dovodi do suprotnog. Ne zaboravimo da se nalazimo u posebnom periodu, periodu pripreme za ramazan, mjesec kada nastojimo da uvecamo svoje ibadete. Jer:

- ramazan je tu s nama da bi griješni saprali sa sebe prljavštinu grijeha i prestupa,
- ramazan je tu s nama da ukroti strasti, umanji šejtansko zavođenje i suži puteve šejtanu,
- ramazan je tu s nama, on je naša utjeha, naš novi početak kao bolji mu'mini.

Zatražimo oprost od Allaha, Subhaneh, za svoje postupke te zatim tražimo halala. Traženje halala i opraštanje je od stubova pravednosti. Nastojmo od sebe odagnati šejtana i džahilijet u kojem smo odrasli, činimo dobra djela koja će obrisati ona loša koja smo učinili, i nastojmo da zaslužimo oprost našeg Gospodara i milost, da bi na onom svijetu uspjeli.

I neka naša posljednja dova glasi: Hvala Allahu, Gospodaru svih svjetova!

Pripremila Ummu Esma



MJESEC RAMAZAN KROZ RAZNE ASPEKTE

Postom mjeseca ramazana postižemo Allahovom milošću Njegovu nagradu, kako je obećao Allah, Subhanehu ve Te'ala. Od Ebu Hurejre, radijAllahu 'anhu, se prenosi da je Allahov Poslanik, sallallahu 'alejhi ve sellem, rekao: "Post je štit, i neka postač nepristojno ne govori niti čini stvari od džahilijeta, a ako ga neko napadne ili ga bude psovao neka kaže: 'Ja postim, ja postim', jer tako mi Onoga u Čijoj je ruci moja duša, doista je miris iz usta postača kod Allaha bolji (ljepši, ugodniji) od mirisa miska, ostavlja njegovu hranu, njegovo piće i njegovu strast zbog Mene, post je Moj i Ja za njega nagrađujem". (Buharija, Muslim, Ebu Davud, Ahmed i Ed-Darimi)

Zatim postom ujedinjujemo mnoge koristi u pogledu mentalnog, socijalnog, društvenog te zdravstvenog aspekta.



Mjesec ramazan i mentalni aspekt

Mjesec ramazan je mjesec emocionalnog čišćenja, jačanja samodiscipline i povećanja pobožnosti. Prenosi Ebu Hurejre, radijAllahu anhu, da je Poslanik sallallahu alejhi ve sellem, rekao: "Onaj ko ne napusti ružan govor i ružna djela, nema potrebe da ostavlja hranu i piće!" (Buharija) Iz ovoga se jasno vidi da laži, klevete, uvrede, prevare i slično poništavaju post.

Post podstiče na zahvalnost Allahu, Subhanehu ve Te'ala, i na činjenje dobrih djela, jer će postač Njegovom milošću biti nagrađen. Postom povećavamo našu pobožnost, unosimo radost u naš život. Post nas uči samokontroli, pruža nam mogućnost da se odupremo strastima, čisti nam dušu, um nam čini jasnim te nas uči poniznosti.

Mjeseca ramazan i socijalni aspekt

U ovom mjesecu je posebno izražen društveni čin solidarnosti sa siromašnima. Nije u skladu s islamom, uzimati prekomjerne količine hrane, kao što se navodi u Kur'anu u suri El-A'raf (u prevodu 31. ajeta):

"Jedite i pijte, ali ne pretjerujte, Allah zaista ne voli one koji pretjeruju."

U hadisu se kaže: *"Čovjek neće napuniti posudu goru od svog stomaka. Dosta mu je nekoliko zaloga da ojača svoja leđa, a ako već morade malo više da jede, onda neka trećinu stomaka napuni hranom, drugu vodom, a treću neka ostavi da može nesmetano disati."* (Tirmizi) To je i mjesec darežljivosti, ne vezano samo za zekat, nego i dobrovoljnu sadaku. Druga važna stvar je zekatul-fitr, koji se daje kao nadopuna našeg posta, prije isteka mjeseca ramazana. Uzvišeni Allah je propisao zekatul-fitr kao čišćenje postača od beskorisnog i ružnog govora, i kao hranu za siromahe, koja će im biti dovoljna tog svečanog dana (Bajrama), shodno hadisu Ibn-Abbasa, radijAllahu anhu, "Ko ga da prije namaza prima se kao zekatul-fitr, a ko ga da poslije namaza onda je to obična sadaka." Jedno od značenje u društvenoj sferi mjeseca ramazana je i okupljanje obitelji za jelom, jer niko ne može reći da "nije gladan" ili "već je jeo". Uz svakodnevni stres i naporan posao nemate vremena za obitelj ali u mjesecu ramazanu imate mjesec dana da braću, sestre, rodbinu, pozovete na iftare te jačate vaše odnose. U hadisu se navodi da: *"Ko pripremi iftar postaču, imaće nagradu kao i on, a da se postaču njegovi sevapi uopšte ne umanju."* (Tirmizi)

Mjeseca ramazana i fizicki aspekt - zdravlje

Učinak posta na zdravlje je, sasvim očit: *"Post je štiti"*- kako se prenosi od Poslanika, alejhisselam. Tokom posta, razgrađuju se štetne masne tvari u tijelu, a post pomaže odstraniti određene bolesti želuca, te utiče na probavu. Postom čovjek čisti tijelo od štetnih materija, koje su se nagomilale u njegovom tijelu, unoseći ih tokom čitave godine putem hrane u svoje tijelo. Važnost umjerenog jela, možemo vidjeti iz opšeg pravila Vjerovjesnika, sallallahu alejhi ve sellem, koji kaže da bi trebali ispuniti naš želudac samo jednu trećinu hranom, jednu trećinu s vodom i trećinu ostaviti prazno, tako da želudac nije pretjerano opterećen.

Zadnjih deset dana ramazana

Mnogi postači provode zadnjih deset noći ramazana u posebnoj odanosti Stvoritelju nadajući se Allahovom oprost. U zadnjih deset dana se nalazi i Lejletul Qadr, noć kakva se samo jednom u toku cijele godine pojavljuje, pa zato vjernici treba da se potrude da se okoriste njenim blagodatima i da uberu njene plodove. U tome smislu Poslanik, sallallahu alejhi ve sellem, kaže: *'Onome ko provede Noć Qadr u ibadetu, vjerujući i nadajući se Allahovoj nagradi, Allah će mu oprostiti sve prethodne grijehel'* Dakle, tu noć treba provesti u klanjanju dobrovoljnog (nafila) namaza, učenju Kur'ana, učenju razlicitih oblika zikra (tekbir, tehlil, tahmid, tesbih...), tj. sjećanja na Allaha, obraćanju Uzvišenom putem dove i tevbom, tj. pokajanjem, te traženjem oprosta od Najmilostivijeg od svih milostivih.

Pripremile Ummu Emin i Ummu Abdullah

"Dova koja se ne odbija prilikom iftara, shodno hadisu Ebu Hurejre, radijallahu anhu od Poslanika sallallahu alejhi ve sellem: "Trojici se ne odbija dova: postaču prilikom iftara, pravednom vladaru i onome kome je učinjena nepravda."
(Et-Tirmizi 2528, Ibn Madždže 1752 i Ibn Hibban 2407)

Najbolja dova je ona koja se prenosi od Poslanika, sallallahu alejhi ve sellem, koju bi izgovarao prilikom iftara:
"Zehebez-zamu vebtelletil-uruku ve sebetel-edžru inšaAllah."
(Nestala je žeđ i ovlažile su vene i potvrđena je nagrada, ako Allah da) (Ebu Davud, 2/306, Bejheki 4/239, Hakim, 1/422, En Nesai 269, Darekutni 2/185)

Enes, radijallhu anhu, prenosi:
"Jednom, kada je počeo Ramazan, Allahov Poslanik, sallallahu alejhi ve sellem, je rekao:
"Došao vam je mjesec u kojem se nalazi noć bolja od hiljadu mjeseci. Ko bude lišen njenih blagodati, lišen je sveg dobra! A njenog dobra biva lišen samo onaj ko je nesretnik!"
(Prenosi Ibn Madže)



KORISTI MJESECA RAMAZANA

Mjesec ramazan je mjesec u kojem je počelo objavljivanje Kur`ana, koji je putokaz ljudima. U ovom mjesecu Allah oprašta grijeha, uvećava nagradu i obilno daruje. Mjesec ramazan ima puno vrijednosti i koristi, a mi ćemo ovaj put navesti sljedeće:

1. **U ramazanu je počelo objavljivanje Kur`ana.** Uzvišeni kaže:

"U mjesecu ramazanu počelo je objavljivanje Kur'ana, koji je putokaz ljudima i jasan dokaz pravog puta i razlikovanje dobra od zla. Ko od vas u tom mjesecu bude kod kuće, neka ga u postu provede!" (El-Bekare, 185)

2. **U njemu se otvaraju džennetska vrata i zatvaraju džehennemska, a šejtani se vezuju u lance.** Poslanik, sallallahu 'alejhi ve sellem, je rekao: *"Kada nastupi prva noć ramazana, okivaju se šejtani i džini odmetnici, i zatvaraju se vrata Džehennema, tako da se nijeda više ne otvore, a otvore se vrata Dženneta, tako da se nijeda više ne zatvore, a glasnik poviče: 'O to koji želiš hajr, pristupi! A ti koji želiš zlo, odstupi!' I Allah tada oslobađa svoje robove iz vatre i to svaku noć.'"* (Hadis bilježe Tirmizi, br. 682, Ibn Madže, br. 1642 i Ibn Huzejme, 3/188, putem Ebu Bekra ibn Ajjaša od El-E'ameša od Ebu Hurejre, radijAllahu 'anhu. Ovaj sened je dobar)

3. **Zadah iz usta postača Allahu, subhanehu ve te'ala, ljepši je od mirisa miska, meleki traže oprost za postače sve dok se ne iftare, Allah, subhanehu ve te'ala', svaki dan uljepšava svoj Džennet, u ovom mjesecu se vežu neposlušni šejtani te u zadnjoj trećini opraštaju se grijesi.** Za sve ove vrijednosti nam je dokaz sljedeći hadis, koje prenosi Imam Ahmed, rahmetullahi 'alejhi, bilježi od Ebu Hurejre, radijAllahu 'anhu, da je Allahov Poslanik, sallallahu 'alejhi ve sellem, rekao: *"Mome narodu u mjesecu ramazanu je dato pet stvari koje nisu date nijednom drugom narodu prije njih: zadah iz usta postača Allahu, subhanehu ve te'ala, je ljepši od mirisa miska; meleki traže oprost za postače sve dok se ne iftare; Allah, subhanehu ve te'ala, svaki dan uljepšava Svoj Džennet i govori: 'Nadati se da moji dobri robovi odbace od sebe nedaće i tegobe pa se usmjere prema tebi'; u njemu se vežu neposlušni šejtani, pa se ne puštaju ka onima koje inače napadaju u drugim mjesecima i u zadnjoj noći opraštaju im se grijesi."*

4. **Svako dobro djelo u ramazanu vrijedi od 10 do 700 puta više.** To se vidi iz hadisa, koji stoji u predanju kod imama Muslima: *"Svako djelo koje čini čovjek pripada njemu i ono se uvećava od deset do sedam stotina puta osim posta. On (post), doista, pripada Meni i Ja za njega nagrađujem (posebno). Čovjek sputava svoje strasti i ostavlja hranu radi Mene!"*



5. Post i Kur'an će se zauzimati za čovjeka na Sudnjem Danu. Od Abdullaha ibn Amra, radijAllahu anhu, se prenosi da je Allahov Poslanik, sallallahu alejhi ve sellem, rekao: *"Post i Kur'an će se zauzimati za čovjeka na Sudnjem Danu. Post će reći: 'Gospodaru, ja sam bio razlog zbog kojeg je ostavljao hranu i sputavao strasti, pa, primi moje zauzimanje za njega!'* Kur'an će reći: *'Ja sam bio razlog zbog kojeg*

je ostavljao spavanje noću, pa, primi moje zauzimanje za njega!' I njihovo zauzimanje će se i primiti."

6. Umra u ramazanu vrijedi kao obavljeni hadždž. Dokaz nam je sljedeći hadis, gdje Poslanik, sallallahu 'alejhi we sellem kaže: *"Umra u ramazanu je kao obavljeni hadždž."* A u drugoj predaji stoji da je umra u ramazanu kao obavljeni hadž sa Poslanikom sallallahu alejhi ve sellem (napominjemo čitaoce da se ovde radi o visini nagrade. Obaveza obavljanja hadždža kao petog islamskog šarta ostaje na svakome pojedincu).

7. U njemu se nalazi noć koja je bolja od hiljadu mjeseci. Allah, Subhanehu ve te'ala kaže: "Mi smo ga počeli objavljivati u noći Qadr - a šta ti misliš šta je noć Qadr? Noć Qadr je bolja od hiljadu mjeseci - meleki i Džibril, s dozvolom Gospodara svoga, spuštaju se u njoj zbog odluke svake, sigurnost je u njoj sve dok zora ne svane." (prevod značenja sure El-Qadr, 1-5) Poslanik, sallallahu 'alejhi ve sellem, je rekao: *"Došao vam je mjesec u kojem se nalazi noć bolja od hiljadu mjeseci. Ko bude lišen njenih blagodati, lišen je sveg dobra! A njenog dobra biva lišen samo onaj ko je nesretnik."* (Hadis bilježi Ibn Madže)

8. Beričet u ustajanju na sehur. Enes ibn Malik, radijAllahu anhu, prenosi da je Poslanik, sallallahu alejhi ve sellem, rekao: *"Ustajte na sehur, jer je u njemu, doista, beričet!"*

9. Allahu dragi robovi su oni koji najviše žure sa iftarom. Ebu Hurejre, radijAllahu anhu, prenosi da je Allahov Poslanik, sallallahu alejhi ve sellem, rekao: *"Allah Uzvišeni je rekao: 'Moji najdraži robovi su oni koji najviše žure sa iftarom!'"*

10. Onaj koji pripremi iftar postaću imat će nagradu kao postač. Zejd ibn Halid el-Džuheni,

radijAllahu 'anhu, prenosi od Allahovog Poslanika, sallallahu alejhi ve sellem, da je rekao: *"Ko pripremi iftar postaču, imat će nagradu kao i on, a da se postaču njegovi sevapi uopće ne umanje!"*



11. Opraštanje malih grijeha. Od Ebu Hurejre, radijAllahu 'anhu se prenosi da je Poslanik, sallallahu alejhi ve sellem, rekao: *"Ko isposti ramazan vjerujući i nadajući se nagradi, oprošteni su mu grijesi koje je do tada počinio."* (Buharija, 4/99 i Muslim, br. 759) Takođe se prenosi od ovog ashaba i sljedeći hadis: *"Pet dnevnih namaza, džuma do džume, ramazan do ramazana - brišu grijeha između njih, ako se klonite velikih grijeha."* (Muslim, br. 233)

12. Primanje dove. Kaže Poslanik, sallallahu alejhi ve sellem: *"Trojici se ne odbija dova: postaču dok se iftari, pravednom vladaru i onome kome je učinjena nepravda (mazlumu)."* Hadis bilježi imam Tirmizi i smatra ga sahihom (Sahihu Džami` a 2526).

13. Oslobođanje od vatre. Prenosi se da je Poslanik, sallallahu alejhi ve sellem, rekao: *"Zaista Allah u mjesecu ramazanu, svaki dan i noć ima one koje oslobađa vatre, a svaki musliman koji uputi dovu tražeći njome nešto, biva mu uslišana."* (Ahmed, 2/254, El-Bezzar, br. 3142)

14. Post je štit. Poslanik, sallallahu alejhi ve sellem, kaže: *"Post je zaštita, a sadaka gasi grijeha kao što voda gasi vatra."* (Ahmed, Tirmizi)

15. Postač se ubraja u pravednike i šehide. Od Amra ibn Murre El-Džuhenija, radijAllahu 'anhu (vidi "El-Ensab", 3/394, od Es-Sem'anija i "El-Lubab," 1/317, od Ibnul-Esira) se prenosi da je rekao: *"Jedan čovjek je došao Poslaniku, sallallahu alejhi ve sellem, i rekao mu: 'Allahov Poslaniče, ako budem svjedočio La ilahe illAllah (da niko ne zasluži da bude obožavan mimo Allaha) i da si ti Njegov poslanik, i budem obavljao pet dnevnih namza i davao zekat, te postio ramazan, iz koje sam ja skupine?' Pa mu je on, sallallahu alejhi ve sellem, odgovorio: 'Od pravednika i šehida.'"* (Ibn-Hibban, br. 19 u "Zevaidu," a njegov lanac prenosilaca je ispravan)

16. Za jedan dan posta radi Allaha, Allah će udaljiti lice postača za 70 godina od Vatre. Poslanik, sallallahu alejhi ve sellem je rekao: *"Ko god posti jedan dan radi Allaha, Allah će udaljiti njegovo lice 70 godina od Vatre."* (Muslim, 2/808)

Molimo Allaha da nam olakša, da provedemo ovaj ramazan u ibadetu i pokornosti Njemu, da primi naša dobra djela i oprosti nam grijeha, da na kraj ramazana izađemo čisti od grijeha. Također molimo Allaha da nas sačuva prljavštine kufra i širka i njegovih sljedbenika, da nas udalji od džehennemske vatre i uvede nas u džennet. Amin. I na kraju neka je hvala Allahu, Gospodaru svjetova.

Nekoliko svijetlih primjera učenja Kur'ana tokom ramazana

Prenosi se da bi El-Esvad ibn Jezid En-Naha'i tokom ramazana proučio Kur'an svake dvije noći. Spavao je između akšama i jaciye. Tokom drugih mjeseci bi proučio čitav Kur'an svake šeste noći.
(Ebu Nuejm, Hiljatu El-Evlija, 1:250)

Ebul Ashab prenosi da je Ebu El-Raja El-Atarudi proučio čitav Kur'an tokom noćnog namaza svako deset dana.
(Ebu Nuejm, Hiljatu El-Evlija, 1:348)

Qatada bi proučio čitav Kur'an svake sedme noći, ali tokom ramazana bi proučio čitav Kur'an svake tri noći, a zadnjih deset dana bi proučio Kur'an svake noći.

(Ebu Nuejm, Hiljatu El-Evlija, 1:364)

Od El-Rabi' ibn Sulejmana se prenosi da je Muhammed ibn Idris Eš-Šafi'i učio Kur'an šezdeset puta tokom ramazana i to sve tokom namaza.

(Ebu Nuejm, Hiljatu, El-Evlija, 4:107)

Buharija bi svaki dan proučio čitav Kur'an. Tokom ramazana je pored toga u noćima poslije teravije sa drugim učenjem Kuran skroz proučio svake tri noći. (El Zehebi, Sijar A'lam El -Nubala, 12:439)

I na kraju jedna napomena od Ibn Redžeba kod ovih primjera:

Zabrana da se Kur'an prouči skroz za manje od tri dana (što je prenešeno u nekim hadisima) se odnosi na one koji to rade stalno (čitave godine). Ali u posebnim periodima kao što je tokom ramazana, te zadnjih deset dana ramazana ili tokom posjete Mekki (osim onih koji tamo žive) preporučeno je da se učenje Kur'ana poveća. Ovo je mišljenje imama Ahmeda, Ishaq (ibn Rehuje) i drugih imama.

(Lata'if Al-Ma'arif, str. 319)





Onaj ko nahrani gladnog

Allahov Poslanik, sallallahu alejhi ve sellem kaže: *"Stvorenja su Allahovo porodica, a najdraži su Mu oni koji koriste Njegovom ummetu."* (Medžmeuz-zeva`d, 8/191)

Uzvišeni Allah nabraja vrste sretnika, pa započinje s onima koji dijele sadaku:

»Onima koji milostinju budu udjeljivali i onima koje je budu udjeljivale, i koji drage volje Allahu budu zajam davali - mnogostruko će se vratiti i njih čeka nagrada plemenita." "Oni koji u Allaha i poslanike Njegove budu vjerovali imaće u Gospodara svoga stepen pravednika i mučenika i dobiće nagradu kao i oni i svjetlo kao i oni; a oni koji ne budu vjerovali i dokaze Naše budu poricali biće stanovnici u vatri." (El-Hadid, 18-19)

Ibn Kajjim u svojoj knjizi 'Knjiga uputa' na stranici 367-368 navodi: »Sadaka ima koristi koje samo Allah može nabrojati. Ona štiti od zlih događaja i otklanja nesreću. Štaviše, ona štiti i nepravednog. Ibrahim en-Nehai kaže: "Smatra se da sadaka štiti nepravednog čovjeka, gasi grijehe, čuva imetak, privlači nafaku, raduje srce, stvara povjerenje u Allaha i lijepo mišljenje prema Njemu, a škrtost je loše mišljenje prema Allahu. Sadaka ponižava šejtana, kristališe dušu, izgrađuje je, čini čovjeka dragim Allahu i ljudima i skriva mu svaku sramotu, a škrtost pokriva svako dobro djelo. Sadaka produžava život, povlači dove i ljubav ljudi i lišava čovjeka kaburskog azaba. Ona će mu biti hlad na Sudnjem danu. Ona će se zauzimati za njega kod Allaha, ublažit će mu poteškoće ovoga i budućeg svijeta. Uputit će ga na dobra djela koja će mu biti dostupna, a koja će mu donijeti mnogostruku korist."

Kada od udjelivanja ne bi bilo druge koristi osim što je to Allahova osobina, bilo bi dovoljno. Allah voli one koji se okite Njegovim osobinama ili njihovim tragovima. On voli učene, darežljive, stidljive i diskretne. Draži mu je jaki vjernik od slaboga. Voli pravednog, onoga koji oprašta, milostivog, zahvalnog, dobročinitelja i plemenitog. Njegove su osobine bogatstvo i darežljivost, tako da On voli bogatog darežljivca.

Dovoljan znak vrijednosti donošenja koristi putem imetka jeste to da će nagrada za to biti iste vrste kao i djelo.

Tako će onoga ko obuče vjernika, Allah obući na Sudnjem danu. Onoga ko nahrani gladnog, Allah će nahraniti džennetskim voćem. Ko napoji žednog, Allah će ga napojiti pićem Dženneta. Ko otpusti roba, Allah će za svaki organ oslobađati njegove organe od vatre, sve dok ga potpuno ne oslobodi. Ko olakša čovjeku u teškoći, Allah će mu olakšati na ovom i budućem svijetu. Ko oslobodi vjernika nekog tereta ovog svijeta, Allah će ga osloboditi tereta na Sudnjem danu. Allah pomaže čovjeka dok on pomaže svog brata.” (kraj citata)

Kada zastanemo kod ovih riječi i pomislimo na mjesec ramazan i njegove blagodati ne može niko pametan ostati ravnodušan. Kako ostati mirna srca a Allah ti obećava nagradu. Zaista bi bili nemarni ne iskoristivši sve vrijednosti i blagodati koje ovaj mubarek mjesec sa sobom nosi. A sadaka? Sadaka koju udjeliš nikada neće propasti inšaAllah. Ne dozvolimo da nas šejtan plaši time da će nam se radi udjeljenje sadake imetak umanjiti ili da ćemo postati siromašni. Naprotiv, naš imetak će se uvećati i postajemo samo bogatiji kako god. Imajmo uvijek na umu da je Allah subhanehu ve te ala Skrbnik, da On daje i da On uzima.

Od Mu'aza ibn Džebela, radijallahu 'anhu, prenosi se da je rekao: “Rekao je Allahov Poslanik, sallallahu alejhi ve sellem: *‘Post je zaštita, a sadaka gasi grijehe kao što voda gasi vatra.’*” (Ahmed, Tirmizi, Hakim)

Pripremila Bint Merjem

Ruknovi posta



Post se sastoji iz dva rukna a to su:

1. Uzdržavanje (imsak) od onoga što kvari post od zore do zalaska sunca.

Dokaz za to je 187. ajet sure El-Bekare u

kome se dozvoljava sastajanje sa ženama u noćima ramazana, a zabranjuje danju. Zatim se dalje u ajetima veli: “I jedite i pijte dok vam ne bude jasan bijeli konac od crnog konca (dok zora ne zabijeli), zatim upotpunite post do noći.” (El-Bekare, 187)

2. Nijet (odluka), a potvrda za to je hadis Allahovog Poslanika Muhammeda, sallallahu alejhi ve sellem, koji kaže: “*Djela se se računaju po nijetu...*” Potvrda za to je i hadis koji prenosi Ibnu Omer od Hafse, da je rekao Muhammed, sallallahu alejhi ve sellem: “*Ko ne zanijeti ovaj post prije sabaha, nema posta.*” Ovaj hadis prenosi pet od šest hadisi zbirk (El-Kutubu-s-sitte). Nijet se ne izgovara jezikom, on se samo srcem zanijeti i odlučiti. Tako se donosi nijet za bilo koji drugi ibadet. Dakle, nijet je unutarnja odluka srca da se izvrši određeni ibadet i ta odluka nema nikakve veze sa jezikom i izgovaranje bilo kakve formule.

Pripremila Ummu Muhammed-Np

OJAČAVANJE VJERSKIH PORIVA POSTIŽE SE SLJEDEĆIM POSTUPCIMA:

PRVI: VELIČANJE I POŠTOVANJE UZVIŠENOG ALLAHA, TAKO DA SE ČOVJEK STIDI POČINITI GRIJEH DOK GA ON VIDI I ČUJE. KO OVO OSJEĆANJE USADI U SEBE NEĆE SE USUDITI NA GRIJEH NIKADA;

DRUGI: USAĐIVANJE LJUBAVI PREMA UZVIŠENOM ALLAHU. ČOVJEK NEĆE UČINITI GRIJEH ONOME KOGA VOLI: 'ONAJ KO VOLI POKORAN JE VOLJENOME.'

NAJVREDNIJE ODRICANJE JESTE ODRICANJE ONIH KOJI VOLE, A NAJVREDNIJA JE POKORNOST POKORNOST ONIH KOJI VOLE. VELIKA JE RAZLIKA IZMEĐU OSTAVLJANJA I POKORAVANJA VOLJENOME I OSTAVLJANJA I POKORAVANJA ONOME ČIJE SE KAZNE PRIBOJAVAMO;

(IBN KAJJIM, STR. 80 "KNJIGA UPUTA ZA STRPLJIVE I ZAHVALNE")

Niskost grijeha je teža od iskušenja vjerovanja. Pojava da nevjernika, razvratnika i licemjera zapadnu snaga, uspjeh i slava, a da to ne zapadne vjernike česta je, samo što je to u biti njihov krah i propast, i ako izgleda sasvim drukčije.

Hasan el-Basri, Allah mu se smilovao, rekao je: "Kad bi ponosno koračali kao jahači konji, glavu visoko dizali kao deve, a srca im bila griješna, uzalud im je jer Allah, nesumnjivo, ponizi onoga ko griješi."



Ona koja je najpruženije ruke

O njoj je Allahov Poslanik, sallallahu alejhi ve sellem, svojim ženama, u hadisu koji bilježi Muslim od Aiše, radijallahu anha, rekao: “Od vas će mi se najprije pridružiti ona koja je najpruženije ruke.” Aiša je rekla: “Međusobno su se nadmetale koja je od njih najdarežljivija, pa je među nama najdarežljivija bila Zejneba, jer je svojim rukama pravila i to djelila kao sadaku.” (Sahihu Muslim, 16/8 knjiga Fedailus sahabeti, poglavlje Fedailu ummul-mu'minine Zejneb) Poslao joj je Omer ibn Hattab, radijallahu anhu, poklon, pa pošto joj je unesen, rekla je: “Neka Allah oprostí Omeru. Bilo koja druga moja sestra bila je preča od mene da ovo dobije.” Rekli su: “Sve je ovo tebi.” Uzviknula je: “SubhanaAllah! Istresite ga i prekrijte ga ogrtačem.” Nakon toga je Berzeti bint Rafi', koja prenosi ovaj haber, rekla: “Zavuci svoju ruku i zahvati koliko možeš i idi s time do plemena tog i tog, do njene rodbine i njenih siročadi. I sve je tako bilo dok nije nešto malo ostalo ispod ogrtača. Berzeta bint Rafi' rekla joj je: “Neka ti Allah oprostí, majko vjernika. Tako mi Allaha, mi u ovome imamo pravo na jedan dio.” Na to je ona rekla: “Vama pripada ono što se nalazi ispod ogrtača,” pa smo mi pod njim našli osamdeset pet dirhema. Nakon toga podigla je svoje ruke prema nebesima i rekla: “Allahu moj, podari mi da me nakon ove godine ne zatekne Omerov poklon, te je i umrla prije tog poklona.” (Tabekatu Ibn Sa'd, 8/109,110, Sifetus-safveti, 2/48 i Sijeru e'alamín – nubelai, 2/212)

Ibn Sa'd prenosi da je, nakon što je Zejnebi odnio ovo blago, ona rekla: “Allahu moj podari mi da me ne zatekne imetak koji dolazi iza ovoga, jer je on fitnet (kušnja).” Zatim ga je dijelila svojoj rodbini i siromasima sve dok ga nije dokrajčila. Ovaj primjer majke vjernika nam pokazuje najbolje kako se trebamo se odnositi prema svome imetku i kako trebamo da udjeljujemo. Jer, kada nas spuste u kabur, imetak ostaje za nama a jedino naša dobra djela idu s nama, a jedno od dobrih djela je svakako naše udjeljivanje. U ovom mjesecu oprosta, budimo i mi što više darežljive, jer prenosi se da je Poslanik, sallallahu alejhi ve sellem, bio najdarežljiviji u mjesecu Ramazanu, kao što se to navodi u hadisu kojeg prenosi Ibn Abbas, radijallahu anhu. (Buhari, Savm 4/116); Muslim, Fedail (15/68-69)

Enes, radijallahu anhu tako pripovijeda: „Od Poslanika, sallallahu alejhi ve sellem, ne bi islamom ništa bilo zatraženo, a da ne bi to i udijelio. Tako je došao neki čovjek pa mu je dao stado koje je napunilo dolinu između dva brda. Taj čovjek se povratio svom narodu rekavši: „O moj narode, primite islam! Muhammed udjeljuje ne bojeći se oskudice!“ (Muslim, Fedail, 15/104) Nek nam ovo budu svijetli primjeri našeg odnosa prema udjeljivanju, i ne plašimo siromaštva i oskudice radi naše sadake. Kad god i koliko god da udjelimo, Allah nam to višestruko vrati. Zato, požurimo sa ovim dobrim djelom.

Pripremila Ummu Amina

Potvora i skrnavljenje časti muslimana II dio

Uzvišeni Allah kaže:

„Reci robovima Mojim da govore samo lijepe riječi: - jer bi šejtan mogao posijati neprijateljstvo među njima, šejtan je, doista, čovjekov otvoreni neprijatelj“ (El-Isra', 53)

Ne padajmo u njegove zamke i bojmo se Allaha! Bojmo se Allaha istinskom bogobojažnošću! Neka niko od nas ne kaže za svoju sestru ono što ne bi voljela da se za nju govori. Neka ne prenosi ono što zna da će muslimane da zavadi, da stvori mržnju među sestrama. A posebno, ne pomažite se u zlu. Pa ako vidiš sestru da je šejtan prevario i da je poklekla, pomoz je, opomeni je, ukaži na grešku na najbolji način, a ne budi šejtanski izaslanik koji će je pomoći u činjenju zla i kaljanju časti muslimanke. Dunjaluk je prolazan, a kod Allaha je sve zapisano, svaka riječ, pa se trebamo bojati da nas na Sudnjem danu naš jezik ne obruka, naše ruke i naše noge, subhanAllah! Postidimo se Allaha Subhaneh i zatražimo oprost od svoje sestre ako smo je ogibetili, potvorili, ponizimo se Allaha radi i budimo u tome iskreni pa će nas Allah uzdići. Sjetimo se samo primjera naše majke Aiše, radijAllahu 'anha, kakve je muke preživjela kad je bila potvorena, pa je Allah obznanio njenu čednost i začepio usta svakom bolesnom srcu. A danas objava ne silazi i nema onoga ko bi mogao da opravda bilo koga, zato je na nama muslimankama da stanemo jedna uz drugu i branimo čast jedna drugoj, kako je i naređeno u hadisima Poslanika, sallallahu alejhi ve sellem. A divna li je nagrada onome ko tako bude postupao. Sjetimo se primjera Jusufa, alejhisselam i njegove muke a bio je čestit i čedan. Ali na kraju istina uvijek izađe na vidjelo, i Allah, Sveznajući, uzdigne čestite, pobožne i Njemu odane, a ponizi one koji takvima čast kaljaju ako se ne pokaju, ne zatraže halala i ne poprave. Sjetimo se da je šeri'atska kazna za potvoru koja nije dokazana osamdeset udaraca bičem! Da, osamdeset! Jer je čast muslimana SVETA!!! Pa budimo, o Allahove robinje, sestre u dinu, ispunjavajmo haqqove jedne drugima.

Ebu Hurejre radijAllahu anhu, prenosi da je Allahov Poslanik, sallallahu alejhi ve sellem, rekao: *„Ne zavidite jedan drugom, ne mrzite se međusobno, ne okrećite leđa jedan drugom, ne namećite se u kupovini, nego, o Allahovi iskreni robovi, budite prava braća. Musliman je muslimanu brat, on ga neće oštetiti, niti potcjeniti, niti ga na cjedilu ostaviti.“*

Takvaluk je ovdje i pokaza na svoja prsa, tri puta. Dosta je čovjeku zla da omalovažava svog brata muslimana. Sve što je vezano za muslimana haram je drugom muslimanu, njegova krv, njegov imetak i njegova čast." (Muslim)

"Nema čovjeka muslimana koji će stati u odbranu časti svoga brata, a da Allah neće uzeti Sebi u obavezu da ga zaštiti od Džehennemske vatre na Kijametskom danu." (Ahmed)

I na kraju, za opomenu, poslušajmo šta naš Poslanik, sallallahu alejhi ve sellem, kaže o ovome: *Abdullah ibn Omer prenosi da je Allahov Poslanik, sallallahu alejhi ve sellem, rekao: "Musliman je muslimanu brat, ne čini mu nepravdu, niti ga ostavlja na cjedilu. Ko pomaže svome bratu muslimanu, Allah će njemu pomoći. Ko otkloni nedaću od svog brata muslimana, Allah će otkloniti od njega nedaću na Sudnjem danu. Ko prikrije sramotu svoga brata muslimana, Allah će prikriti njegove sramote na Sudnjem danu." (Buhari)*

Prenosi imam Ahmed od Sevbana, radijAllahu anhu, da je Poslanik, alejhisselam, rekao: *"Ne uznemiravajte Allahove robove niti ih brukajte, niti tragajte za njihovim propustima. Onaj ko traga za propustima svoga brata muslimana Allah će njegov propust tražiti sve dok ga u vlastitoj kući ne obruka."*

Prenosi Abdullah ibn Amr, radijAllahu 'anhu, da je Poslanik, sallallahu alejhi ve sellem, rekao: *"Ko želi da bude udaljen od vatre i uđe u džennet, neka mu dođe smrt a on vjeruje u Allaha i Sudnji dan i neka ljudima čini ono što želi da oni čine njemu!" (Ahmed)*

Prenosi Ebu Hurejre, radijAllahu anhu, da je Poslanik, sallallahu alejhi ve sellem, rekao: *"Znate li ko je gubitnik?" Rekoše: 'Gubitnik je onaj ko nema dirhema i potreština.' Reče: 'Gubitnik od moga ummeta je onaj koji dođe na Sudnji dan sa: namazom, nafilama i zekatom, a grdio je ovoga, potvorio ovoga, ogovorio ovoga, prolio krv ovoga i udario ovoga, pa će mu se oduzimati od dobrih djela ovome i onome, pa ako mu nestane dobrih djela, uzimaće se od njihovih grijeha i na njega natovariti i biće bačen u vatru.'" (Tirmizi)*

Prenosi se od Ebu Muse el-Ešarija, radijAllahu anhu, da je rekao: *"Upitali smo: 'O Allahov Poslaniče, koji je musliman najbolji?', a on reče: 'Onaj od čijeg su jezika i ruku mirni drugi muslimani.'" (Muttefkun alejhi)*

Također, Poslanik, sallallahu alejhi ve sellem, rekao je: *"Neka se dvojica ne sašaptavaju u prisustvu trećeg. Jer to doista uznemirava vjernika, a Allah, Azze ve Dželle, mrzi uznemiravanje vjernika." (Tirmizi, hadis je sahih)*

Neka se u ovom tekstu prepozna svaka od nas, neka razmisli o svojim postupcima i nek zatraži oprost od Allaha subhaneh za svoje postupke i halala od one sestre kojoj je nepravdu učinila. Neka se svaka od nas zapita kako bi se osjećala da se njoj takva vrsta nepravde učini, i nastojmo od sebe odagnati šejtana i džahilijet u kojem smo odrasli, činimo dobra djela koja će obrisati ona loša koja smo učinili, i nastojmo da zaslužimo oprost našeg Gospodara i milost, da bi na onom svijetu uspjeli.

I neka naša posljednja dova glasi: Hvala Allahu, Gospodaru svih svjetova!

Pripremila Ummu Mudžahid

Moja sestro po islamu

Tako mi je lijepo, kad si blizu mene
osjetim ljepotu i čistost kroz vene.
Samo dobro mogu od tebe da čujem,
pored tebe mogu iskreno Allahu da robujem.

Moja sestro po islamu,
približimo srce iman.
Dunjaluk je kratka vijeka
Allah zna šta nas sutra čeka.

Možda smrt, a možda iskušenja teška,
naš život je samo jedna velika bilješka
dovimo Allahu da nam dođe s desne strane,
naš život je bilješka vrline i mane.

Vrlina je ljepota našeg srca malog,
mana je u njemu crnina i mutan talog.
Čuvajmo se ovoga moja sestro mila,
podsjetime na dobro ma gdje god bila.

Ustrajmo na tewhidu moja sestro mila,
približile smo se jedna drugoj samo bismillah.

Pripremila Ummu Muhammed-Np

O sestro moja

O sestro moja, muslimanko, Do Dženneta doći nije lahko...
Bliži nam se mjesec jedan, Od svih drugih više vrijedan.
Ramadan je blizu, sestro, I ne dolazi tako često, Već godišnje
jednom samo...Iskoristiti dal' ga znamo?

Provedimo dane svoje, Uz Kur'an, zikr i dove, A svaku noć kad
omrknemo Dnevne račune da svedemo... Iskoristi priliku svaku
Da udijeliš tajnu sadaqu, U zamku prigovora nemoj pasti, Pa da ti
djelo upropasti.

Poznato je danas nama Da žene puno pričat vole, Pa nauči jezik
svoj Da nikad nije bez kontrole.

Pripremila Ummu Merdžaan

U kojoj noći je Lejletu-l-Qadr?

Od Ubade ibn es-Samita se prenosi da je rekao: "Allahov Poslanik, sallallahu alejhi ve sellem, je rekao: 'Noć Qadr je u posljednjih deset dana ramazan. Ko ih provede u ibadetu moleći ih da u njima bude nagrađen, Allah će mu oprostiti i pređašnje i docnije grijeh. To je neparna noć: dvadeset deveta, dvadeset sedma, dvadeset peta, dvadeset treća ili dvadeset prva.'"



Muslim u svom Sahihu od Ubejj ibn Ka'ba navodi da je Allahov Poslanik, sallallahu alejhi ve sellem, rekao: "To je dvadeset sedma noć." Od Muavije, Ibn Amara, Ibn Abbasa i nekih drugih se prenosi da je Allahov Poslanik, sallallahu alejhi ve sellem, rekao: "To je dvadeset sedma noć."

Znaci noći Qadr

Allahov Poslanik, sallallahu alejhi ve sellem, je rekao: "Znaci noći Qadr su da je ona čista i svjetla kao da je u njoj pun mjesec. Ona je mirna i tiha. U njoj nema ni prevelike hladnoće ni vrućine. U njoj, dok ne svane, ni jednoj zvijezdi nije dozvoljeno da padne." U njene znake spada: "Sunce kad ona osvane izađe zaokruženo, bez (uobičajenih) zraka, kao da je pun mjesec. Taj dan šejtanu nije dopušteno da s njime izađe." Sened ovog hadisa je hasen.

Poslanik, sallallahu alejhi ve sellem, je rekao: "Ko probdije noć Qadr vjerujući i tražeći nagradu samo od Allaha, biće mu oprošteni prethodni (mali) grijesi." (Buharija, 4/217 i Muslim, 759)

Od Aiše, radijallahu anha, se prenosi da je rekla: "Upitala sam: 'Allahov Poslaniče, ako pogodim noć Qadr, šta ću moliti u njoj?' Odgovorio je: 'Moli: 'Allahume inneke afuvvun tuhibul-afve f'afu anni.' (Gospodaru moj, Ti praštaš i voliš oprost, pa mi oprost)' (Et-Tirmizi, 3760 i Ibn Madždže 3850 od Aiše. Njegov sened je ispravan.)


Takođe se prenosi od Aiše, radijallahu anha da je rekla: "Poslanik, sallallahu alejhi ve sellem, se, kada bi nastupilo posljednjih deset dana ramazana, odvajao od svojih žena radi ibadeta,

Iatio bi se i silno tražeći noć Qadr. Bdio je noću i budio svoje ukućane." (Buhari 4/233 i Muslim, 1174) Majka vjernika Aiša, radijallahu anha nam takođe prenosi i sljedeći hadis: "Poslanik, sallallahu alejhi ve sellem, se mnogo trudio u deset posljednjih dana ramazana. Više nego što bi to činio van njih." (Muslim 1174)

Enes, radijallhu anhu, prenosi: "Jednom, kada je počeo Ramazan, Allahov Poslanik, sallallahu alejhi ve sellem, je rekao: *"Došao vam je mjesec u kojem se nalazi noć bolja od hiljadu mjeseci. Ko bude lišen njenih blagodati, lišen je sveg dobra! A njenog dobra biva lišen samo onaj ko je nesretnik!"* (Prenosi Ibn Madže)

Enes, radijallahu anhu, prenosi da je Resulullah, sallallahu alejhi ve sellem, rekao: *"U noći Lejletu-l-Qadr Džibril, alejhisselam, spušta se na zemlju sa skupinom meleka, blagosiljajući svakog roba koji spominje Allaha stojeći ili sjedeći. Potom se, na dan bajrama, Allah hvali takvim robovima pred Svojim melekima: 'O meleki Moji, šta treba da dobije uposlenik kada uradi svoj posao?' Oni odgovaraju: 'Gospodaru naš, on treba da dobije svoju plaću.' Na to Allah odgovara: 'O Moji meleki, Moji robovi, i muškarci i žene, obavili su ono što sam im Ja propisao. Zatim su skrušeno podigli svoje glasove čineći Mi dovu; tako mi Moje Moći i Veličine, i tako mi Moje Plemenitosti i Mog Uzvišenog položaja - Ja ću im se, uistinu, odazvati.' Nakon toga Allah kaže: 'Vratite se, Ja sam oprostio vaše grijeha i zamijenio sam vaša loša djela dobrim.' Resulullah, sallallahu alejhi ve sellem, rekao je: 'Oni se potom vraćaju s oproštenim grijesima.'"* (Prenosi El-Bejheki u djelu Šu'abu-l-iman)

"Tražite Lejletul-Qadr u neparnim noćima posljednjih deset dana ramazana." (Buhari, 4/225 i Muslim, br. 1169)



DA LI GA ZAISTA VOLIŠ II DIO?

Nekoga zavist tjera na ogovaranje, pa time spaja između dva ogavna postupka: gibeta i haseda! Ako bude prisiljen određenu osobu pohvaliti, maksimalno će nastojati da ga unizi, i da sve to zaodjene vjerom i dobrotom, ili da ga zaodjene zavišću, grijehom i lošim govorom, kako bi navodno nešto odstranio od njega. Neko iznosi gibet i ogovaranje kroz ismijavanje i igru, zasmijavajući ostale potcjenjivanjem nekog čovjeka, ili njegovim imitiranjem, maksimalno ga ponižavajući! Neko gibeti i ogovara druge ljude putem čuđenja, govoreći: **Začudio sam se od te i te osobe, kako da ne uradi to i to, ili: Zabezeknuo sam se od te i te osobe, kako da uradi to i to** - spominjući mu ime prilikom izražavanja svog čuđenja.

Neko gibeti i ogovara druge ljude putem izjavljivanja žalosti i tuge, govoreći: **Jadnik, ožalostilo me to što mu se desilo - dajući do znanja onome koji ga sluša da ga žali i sažaljeva**, ali je stvar obrnuta jer mu je srce puno i sretno što mu se to dogodilo, i kada bi mogao još više bi mu nadodao nego što ga je snašlo, a možda će ga na taj način spominjati kod njegovih neprijatelja kako bi se sladili onim što ga je zadesilo!

Pored navedenog, postoje još mnoge druge bolesti srca, zasnovane na varanju Allaha dželleša'nuhu i Njegovih stvorenja! Neko gibet i ogovaranje ljudi ispoljava putem srdžbe ili negiranja zla, služeći se raznoraznim riječima pri svemu tome, ali mu je cilj i namjera nešto sasvim drugo, vallahul-muste'an! (Pogledaj: Medžmu'ul-Fetava, 28/237-238.)

Ljudi nas mogu cijeniti, mogu nas hvaliti zahvaljivat što smo tako postupili, ali šta ćeš reći Allahu? Ona se često kaje i ispravlja svoje postupke.

„Allah zaista voli one koji se često kaju i voli one koji se mnogo čiste.“ (El- Bekara, 222)

Naš odnos prema Allahu vidi se iz naših postupaka. Prisjetimo se primjera Hadžere, Ibrahimove žene, da bi nam bila jasna vrijednost žene mu'minke i njenog ponašanja prema Allahovoj odredbi. Nakon što Ibrahim, alejhis-selam, ostavlja Hadžeru samu u pustinji i okreće joj leđa odlazeći, ona ga pita: **"Da li ti je ovo Allah naredio?" On reče: "Da." Na te riječi Hadžera odgovori: "Onda nas Allah neće ostaviti same."** Naša djela govore ono što riječi ne mogu. Ako popravimo odnos prema Allahu popraviti će se i naš život, naša iskušenja su lakše prihvatljiva, naša srca su smirenija... Kad nam ljubav prema Allahu bude tolika da se ljutimo i bunimo onda kad nam se vrijedja najdraže biće, Allah Uzvišeni, kad se budemo samo za odbranu vjere svjetili i uzvraćali zulum, a sebe zapostavljali i gledali da nam svaki postupak bude radi Allaha i Njegovog zadovoljstva, kad svoje strasti pokorimo Allahovom zadovoljstvu uspjeli smo! Aiša, radiAllahu 'anha, kaže u hadisu koji bilježi Muslim: **"Poslanik, sallallahu alejhi ve sellam, nije nikoga u životu udario, ni ženu ni slugu, osim što se borio na Allahovom putu, i nije se nikada osvećivao radi sebe osim ako bi se povrijedile Allahove svetinje, pa bi se onda svetio radi Allaha, dželle ša'nuhu."** Ako želiš biti od onih koje vole Allaha i onih koje Allah voli, moraš svoj nefs, svoje strasti, shvatanja, misli, život sve podrediti Allahovom zadovoljstvu! Prenosi se od Hafsa ibn Humejda da je rekao: **"Ako znaš muslimana po plemenitosti i ljubavi, znaj da su mu grijesi oprošteni, a ako znaš muslimana samo po neprijateljstvu, onda znaj da mu dobra djela nisu primljena."**

Uzvišeni kaže: **"I reci: trudite se! Allah će trud vidjeti, a i Poslanik Njegovi vjernici, i vi ćete biti vraćeni Onome koji zna nevidljivi i vidljivi svijet, pa će vas o onome što ste radili obavijestiti."** (Et-Tawba, 105)

Budimo od onih koje se pokoravaju Voljenom.

Pripremila Ummu Sejfullah



Ženino prisustvovanje bajram-namazu

Islam je počastio ženu i učinio je odgovornom kao i muškarce u ibadetu svome Gospodaru. Islam, također, zagovara da žena prisustvuje i bajramima, ramazanskim i hadžijskom bajramu, kako bi prisustvovala dobru i pozivu upućenom vjernicima. Potvrdu toga nalazimo u mnogim hadisima koje bilježe Buhari i Muslim, između ostalih, u hadisu stoji da je Allahov Poslanik, sallallahu alejhi ve sellem, naredio da sve žene izađu kako bi

prisustvovala tim proslavama, djevojčurci, punoljetne djevojke i one koje nisu punoljetne. Čak i onim koje imaju menstruaciju naredio je da izađu. One neće klanjati, ali će prisustvovati svečanosti, koliko je vodio računa o tome da sve izađu na namaz u ova dva bajrama, očituje se u njegovoj naredbi da ona koja ima više haljina dadne svojoj sestri nešto da obuče na taj dan. U ovome se očituje pažnja da sve žene prisustvuju bajram namazu, a sve to u okviru međusobnog potpomaganja, razumijevanja, jedinstva, dobročinstva i bogobožnosti.

Prenosi se od Ummu 'Atijje da je rekla: "Allahov Poslanik, sallallahu alejhi ve sellem, naredio nam je da izađemo na bajram namaze, djevojčicama i djevojkama, a onima koje imaju menstruaciju naredio je da se udalje s mjesta gdje će se klanjati namaz." (Sahihu Muslim, 6/178, 179, knjiga "Salatul -'idejni,' poglavlje 'ibahatu hurudzin nisa fil 'idejn ilel musalla")

Od nje se, također, prenosi da je rekla: "Bilo nam je naređeno da izađemo na dan bajrama, punoljetne djevojke i one koje to nisu." Rekla je: 'Izašle bi one koje imaju menstruaciju, ali su bile iza svih ljudi i donosile su tekbire zajedno s ostalim svijetom.'" (Sahihu Muslim, 6/179)

Od nje se prenosi i da je rekla: "Allahov Poslanik, sallallahu alejhi ve sellem, nam je naredio da izvedemo na bajram djevojčice, one koje imaju menstruaciju kao i punoljetne djevojke i one koje to nisu. Što se tiče onih koje sui male menstruaciju, one nisu pristupale namazu, ali su prisustvovala dobru i pozivu upućenom muslimanima.

Rekla sam: 'O Allahov poslaniče, jedna od nas nema haljine.' Odgovorio je: 'Neka je odjene njena sestra svojom haljinom.' (Sahihu Muslim, 6/180)




U Buharijinom "Sahihu" navodi se: "Pričao nam je Muhammed bin Selam, pa je rekao: 'Obavijestio nas je AbdulVehhab, a on prenosi od Ejjuba, a on od Hafse bint Sirrin da je rekla: 'Zabranjivali smo našim

djevojkama da izlaze za bajrame. Stigla je jedna žena i odsjela u dvorcu Beni-Halef i pričala o svojoj sestri čiji je muž bio u borbi s Allahovim Poslanikom, sallallahu alejhi ve sellem, u dvanaest pohoda, a i njena sestra je šest puta bila s njim u tim pohodima. Ona je kazivala: 'Brinule smo se o ranjenima, a i o bolesnima, pa je moja sestra upitala Allahovog Poslanika, sallallahu alejhi ve sellem: 'Neće li škoditi ako neka od nas ne bude imala haljinu pa ne izađe?' Odgovorio je: 'Neka je odjene njena prijateljica svojom haljinom i neka prisustvuje dobru i pozivu upućenom vjernicima.' Hafsa je rekla: 'Kada je stigla Ummu Atijje, otišla sam kod nje i pitala je: 'Jesi li čula Allahovog Poslanika, sallallahu alejhi ve sellem?'

Odgovorila je: 'žrtvovala bih oca za njega, jesam' – nikad ga ne bi spomenula a da nije rekla 'žrtvovala bih oca za nje.' 'Čula sam ga kad kaže: 'Neka izađu djevojke i one koje su punoljetne' – ili je rekao: 'Neka izađu one koje su punoljetne i djevojke i one koje imaju menstruaciju. Neka prisustvuju dobru i pozivu upućenom mu'minima a one koje imaju menstruaciju neka se udalje od mjesta gdje će se klanjati.' Hafsa je rekla: 'Upitala sam je: - Zar i one koje imaju menstruaciju?' – Odgovorila je: 'Da. Zar one koje imaju menstruaciju ne borave na Arefatu? I zar ne prisustvuju tome?' ("Fethul bari," 2/469, knjiga "Salatul 'idejni," poglavlje "Iza lem jekun leha džilbabun fil 'idi")

U Buharijinom 'Sahihu', također, navodi se drugo predanje od Ummu Atijje koja kaže: 'Bilo nam je naređeno da izađemo na dan bajrama, pa čak da izađu i djevojke koje nisu punoljetne, pa čak i one koje imaju menstruaciju, ali da budu iza svijeta, da donose tekbire zajedno s njima, da čine dove kad i oni čine dove, da traže o d Allaha, Subhanehu ve Te'ala, da prospe Svoj blagoslov i čistotu toga dana.' ("Fethul bari", 2/461, knjiga "El 'idejni," poglavlje "Et-Tekbiru ejjame Mina.")

U ovim vjerodostojnim hadisima nalazi se očiti dokaz da je Allahov Poslanik, sallallahu alejhi ve sellem, obraćao ogromnu pozornost na svijest žene muslimanke. Stoga je naredio da sve izađu pa čak i one koje sui male menstruaciju, s tim da su one oslobođene namaza i nije im dozvoljeno da prisustvuju mjestu na kojem se klanja. On je svojim pozivom obuhvatio sve žene, vodeći računa da one učestvuju u ovakvim velikim svečanostima, da prisustvuju pozivu upućenom vjernicima, da uče tekbire zajedno s drugima, da čine dove zajedno s drugima i da proživljavaju problem islamskog ummeta o kojima se govori s minbera nakon Bajram-namaza.



Prenosi se od Sehl bin Sa'da, radijAllahu anhu, da je Resulullah, sallallahu alejhi ve sellem, rekao: *"Ljudi će na Sudnjem danu biti sakupljeni na Zemlji koja će biti potpuno bijela kao disk od najbjeljeg brašna i neće na njoj biti znamenja ni za koga."* (Muslim)

Prenosi se od Aiše, radijAllahu anha, da je rekla: *"Čula sam Resulullahu, sallallahu alejhi ve sellem, da kaže: 'Ljudi će na Sudnjem danu biti skupljeni bos, goli i neobrezani', a ja sam upitala: 'Božji poslanice, zar skupa žene i muškarci, da gledaju jedni druge?' A Resulullah je odgovorio: 'O, Aiša stanje će biti tako teško da jedni u druge neće ni pomisliti da gledaju.'"* (Muteffekun alejhi)

Allah, azze ve dželle, kaže: *"A onaj ko okrene glavu od Knjige Moje, taj će teškim životom živjeti i na Sudnjem danu ćemo ga slijepa oživjeti. 'Gospodaru moj', - reći će - 'zašto si me slijepa oživio kad sam vid imao?' 'Evo zašto' - reći će On: 'Dokazi Naši su ti dolazili, ali si ih zaboravljao, pa ćeš danas ti isto tako biti zaboravljen.'"* (Ta Ha, 124-126)

Allah Uzvišeni, kaže: *"Mi ćemo ih, na Sudnjem danu, sakupiti, licem zemlji okrenute, slijepe, nijeme i gluhe, boravište njihovo biće džehennem; kad god mu plamen jenja, pojačaćemo im oganj."* (El Israh, 97)

Prenosi se od Enesa ibn Malika, radijAllahu anhu, kako je neki čovjek upitao: *"O, Božji poslanice, kako će nevjernici biti sakupljeni na Sudnjem danu i okrenuti licem prema zemlji?" A Resulullah je odgovorio: "Pa zar onaj koji je učinio da hoda na dvije noge na dunjaluku nije kadar da učini da hoda na svom licu na Sudnjem danu?" A Katada je dodao: "Tako je, Velikog mi Gospodara."* (Muteffekun alejhi)

Pripremila sestra Aiša

Šehur - palačinke od tikvica

Potrebno:

- 500 gr tikvica
- 2 kašice soli
- 2 jaja
- 150 ml mlijeka
- 150 gr brašna
- 50 gr otopljenog putera



Priprema: Tikvice nije potrebno guliti, samo ih operite, odsjecite krajeve i izrendajte. Zatim tikvice posolite sa jednom kašicom soli i pomješajte, ostavite ih najmanje 1 sahat da puste vodu, pa ih dobro ocjedite. U ocjeđene tikvice dodajte jaja, mlijeko, brašno, otopljen puter i 1 kašicu soli. (ako želite malo više)

Sve dobro pomješati, sipati smjesu otprilike pola cm u zagrijanu tavu, rasporediti pomoću kašike i pržiti na par kapi ulja, na srednjoj temperaturi, dok se lijepo zarumeni. Palačinku možete okretati pomoću velike ravne kašike. Kada okrenete drugu stranu da se peče na već pečenu stranu možete staviti listić topljenog sira za sendviče i malo pobiberiti. Prijatno.

Iftar - riža i piletina

Potrebno:

- 400 do 500 gr pileline
- 300 gr dugozrnate riže
- 1 mala feferonka ili dio feferonke
- na vrh male kašice bibera
- na vrh male kašice kumina
- 2 cm kore cimeta
- 3 zrna kardamoma
- 2 klinčića
- 1 nepuna kašika soli
- 800 ml vode
- kora od četvrtine limuna



Priprema: Rižu oprati i prelići sa vrelom vodom, ostaviti da naraste najmanje 1 sahat. Kada je narasla, procijediti. U široku tavu staviti piletinu koju ste prethodno očistili od viška masnoće, (da nebi sve ispalo premasno) prelići piletinu vodom (800 ml), ubaciti feferonku, biber, kumin, cimet, kardamom, klinčić, so i četvrtinu kore limuna. Sve zajedno kuhati poklopljeno na niskoj temperaturi oko 30 minuta. Zatim piletinu izvaditi u tepsiju i premazati sa tekućom mješavinom začina, pa staviti u ugrijanu rernu da se zapeče ok 30 minuta.

Sve ostale začine također izvaditi iz vode, a u vodu dodati procjeđenu rižu i kuhati na niskoj temperaturi oko 20 minuta, odnosno dok upije svu vodu, pa kada je upila svu vodu, ugastiti sporet i ostaviti poklopljeno da stoji još 10 do 15 minuta. Taman dok se meso zapeče.

-Tekuća mješavina začina

- prstohvat šafrana
- prstohvat kurkuma
- prstohvat

čilijs

- prstohvat cimeta
- pola kašice curry-ja
- 1 kašica soli
- 1 protisnuto čehno bijelog luka
- 1 kašica ružine vodice
- 1 kašica maslinovog ulja
- sok od pola limuna

Sve ove začine dobro pomješati u jednoj šolji.



Badem i grožđice

- 1 fildžan badema
- 1 veoma mala glavica luka
- 1 kašika sitnih grožđica
- 1 kašika maslinovog ulja
- 1-2 kašike tekuće mješavine začina

Bademe prelići ključalom vodom i ostaviti u vodi 1-2 minute, procijediti i oguliti bademe, zatim ih ispržiti na srednjoj temperaturi u maloj teflonskoj šerpi. Pržene izvadite iz šerpe i ostavite na stranu. U istoj šerpi na maslinovom ulju karamelizirati luk izrežan na kriške, dodati tome grožđice, 1 ili 2 kašike tekuće mješavine začina, poklopiti i ostaviti na niskoj temperaturi 2-3 minute. Skloniti prženi luk sa šporeta i pomješati sa bademima.

Ukratko:

Prvi korak - prelići rižu vrelom vodom i ostaviti da naraste.

Drugi korak - pripremiti tekuću mješavinu začina.

Treći korak - pripremiti bademe, luk, grožđice.

Četvrti korak - skuhati piletinu, staviti da se zapeče, pa skuhati rižu.

Serviraje: U veliku tacnu ili porcelanski tanjir prvo izvadite rižu, pospite bademima lukom i grožđicama, pa složite piletinu. Prijatno uz jogurt ili salatu od krastavca i paradajza.

Napomena:

- 1 kašika - velika ili supena kašika,
- 1 kašica- mala ili čajna kašika.

Voda u kojoj se skuha piletina sa začinima i korom limuna može biti malo grka zbog kore limuna i slana, ali će se okus izjednačiti kada se u njoj skuha riža.

Ova kombinacija začina će dati gotovom jelu vemoa lijep i interesantan okus.

Pripremila Ummu Muhammed

Desert - Arapski lokum



Potrebno:

- 2,5 šolje brašna
- 3 kašike škroba
- 1 kašika suhe germe (kvasca)
- 2 šolje i četvrtina šolje mlakog mlijeka
- 1 kašika soli
- 1 kašika šećera

- 1 šolja šećera
limunov sok i ružinu vodicu.

- pola šolje vode
- 1 kašika ružine vodice
- 1 kašika limunovog soka

ili

- 150 gr meda
- 1 kašika ružine vode

šećer i vodu kuhajte da se napravi sirup, na kraju dodajte

med i ružinu vodicu ugrijte u lončiću i pomješajte.

Priprema: sve sastojke dobro pomješajte, poklopite i ostavite na toplo da naraste.

Kada je tjesto naraslo, ne treba ga nikako mješati, nego samo uzimajte pomoću male kašice količinu tjesta koliko je 1 do 2 cm, i spuštajte u zagrijano duboko ulje i pržite na srednjoj temperaturi, da blago zarumeni.

Pržene lokume vadite sa šupljikavom kašikom u cjediljku i sa kašikom uzimajte sirup ili med i prelivajte ih vruće i dobro pomješajte da se sirup ili med lijepo rasporede.


Ovu količinu će te ispržiti iz tri puta.

Pripremila Ummu Muhammed

Posjetite stranice


Islamska stranica na bosanskom jeziku

<http://www.imamitewhida.com>



Islamska stranica na holandskom jeziku

<http://www.ahlul-tawhid.com>



Islamska stranica na engleskom jeziku

<http://www.al-aeedah.com/>

A scenic autumn landscape featuring a calm lake reflecting the sky and surrounding foliage. In the background, a mountain is covered in a dense forest of trees displaying vibrant autumn colors. To the right, a small red wooden cabin is nestled among tall evergreen and colorful deciduous trees. The foreground is framed by branches with bright red maple leaves. The sky is a clear blue with a few white clouds.

Allahu, Gospodaru svjetova,
pripada velika, lijepa,
mubarek-zahvala, koju On voli i
kojom je zadovoljan, kako priliči
svetosti Uzvišenog lica;
zahvala koja ispunjava nebesa i
Zemlju, ono što je između njih i ono
što je preko toga; zahvala koja
sadržava sve zahvale koje mi
znamo i ne znamo, na svim
blagodatima koje znamo i koje ne
znamo; onoliko koliko Ga hvale
zahvalni i zapostavljaju nemarni;
onoliko koliko se Njegovo pero
kreće, koliko Njegova knjiga sadrži i
Njegovo znanje obuhvata.

I neka je blagoslov na našeg
miljenika i poslanika Muhammeda,
njegovu porodicu i sve ashabe, na
sve ostale poslanike, vjerovjesnike i
neka je Allah zadovoljan onima koji
ih slijede do Sudnjeg dana.
Dovoljan nam je Allah i divan li je
On pomagač.